

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 4 JULAI 2019

SOALAN : 45

Tuan Sivakumar Varatharaju Naidu [Batu Gajah] minta **PERDANA MENTERI** menyatakan prestasi dan sumbangan syarikat-syarikat milik Kerajaan (GLC) sejak Pakatan Harapan menjadi Kerajaan Persekutuan. Adakah Kerajaan telah mula menerima pakai piawaian antarabangsa seperti Garis Panduan OECD mengenai Tadbir Urus Syarikat Milik Kerajaan dalam rangka memperbaiki keseluruhan tadbir urus GLC.

**JAWAPAN: YB DATUK WIRA DR. MD FARID BIN MD RAFIK
TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman, Ahli Yang Berhormat, secara amnya, Syarikat-syarikat Berkaitan Kerajaan (GLC) terus memainkan peranan yang sama serta menyumbang kepada pembangunan sosio-ekonomi dan kesejahteraan negara sejak Malaysia ditadbir oleh Kerajaan baharu pada 2018. Seperti juga syarikat-syarikat lain, prestasi GLC ini pula berkait rapat dengan, dan dipengaruhi oleh pelbagai faktor luaran seperti dasar yang ditetapkan oleh kerajaan terhadap industri-industri yang mana GLC ini beroperasi, keadaan pasaran dan sebagainya. Namun demikian, GLC bawah pentadbiran Kerajaan sekarang akan terus ditadbir secara profesional dan berintegriti bagi memastikan sasaran kewangan dan juga matlamat pembangunan negara yang dimainkannya dapat terus dicapai.

SOALAN NO. 45

Sehubungan itu, bagi mencapai matlamat yang ditetapkan oleh Kerajaan, GLC, khususnya syarikat-syarikat yang tersenarai awam, sememangnya memegang teguh dan mengamalkan pelbagai piawaian antarabangsa dan tertakluk kepada peraturan serta garis panduan yang ditetapkan oleh pihak berkuasa dan pengawal selia tempatan, termasuk Suruhanjaya Sekuriti, Bursa Malaysia, Suruhanjaya Syarikat dan sebagainya. Selain daripada penyeliaan luaran, GLC turut ditadbir oleh Lembaga Pengarah masing-masing yang memastikan ia sentiasa memegang teguh kepada tadbir urus dan piawaian yang ditetapkan.

Sebahagi contoh, Kod Tadbir Urus Korporat Malaysia atau Malaysian Code on Corporate Governance (MCCG) yang diperkenalkan oleh Suruhanjaya Sekuriti pada tahun 2000 merupakan panduan penting untuk pembaharuan tadbir urus korporat, dan telah mempengaruhi amalan tadbir urus korporat syarikat-syarikat di Malaysia. GLC, khususnya yang dikuasai oleh Khazanah, mematuhi keperluan penyenaian MCCG dan Bursa. MCCG mencerminkan prinsip-prinsip global dan amalan tadbir urus korporat yang diiktiraf pada peringkat antarabangsa yang melebihi keperluan minimum yang ditetapkan oleh undang-undang, pengawal seliaan atau penetapan oleh Bursa Malaysia.

Pada tahun 2017, MCCG, yang menggantikan edisi awalnya, mengambil pendekatan baharu untuk menggalakkan penghayatan budaya tadbir urus korporat yang lebih mendalam. Kod MCCG ini mengikuti pendekatan “aplikasi atau penerangan alternatif”, yang mana syarikat yang tidak menggunakan amalan yang ditetapkan oleh Kod ini mesti memberikan penjelasan, dan mendedahkan satu amalan alternatif yang mampu memenuhi objektif prinsip-prinsip Kod tersebut.

Khazanah, sebagai salah sebuah syarikat Kementerian Kewangan Diperbadankan, yang juga syarikat pelaburan berkaitan Kerajaan (GLIC), merupakan anggota Institutional Investors Council Malaysia atau IIC dan penandatanganan kepada Kod untuk Pelabur Institusi. Kod ini dibangunkan berdasarkan prinsip-prinsip OECD dan amalan terbaik lain bagi Pelabur Institusi.

Sekian, terima kasih.